


Bosna i Hercegovina

Zemlja šuma

Naša zemlja ima nebrojeno mnogo prirodnih ljepota i potencijala, a šume su resurs kojim se trebamo ponositi.

Sa oko 63% površine pod šumama, Bosna i Hercegovina je jedna od najšumovitijih zemalja u Evropi, a čak petinu ove površine čine šume u privatnom vlasništvu.

Procjenjuje se da je svaki 7. stanovnik BiH privatni šumoposjednik.



ZAŠTO SU ŠUME VAŽNE I ZAŠTO JE VAŽNO SA NJIMA DOBRO (ODRŽIVO) UPRAVLJATI I GOSPODARITI?

Šume predstavljaju velika pluća naše planete i dom su za mnoge žive organizme (procjenjuje se da "čuvaju" 90% svjetske kopnene biološke raznolikosti). Šume štite naše domove sprečavajući eroziju tla, pročišćavaju zrak neophodan za život i pozitivno utiču na mikroklimu u našem okolišu. Šume također štite naše ceste i puteve od vjetrova i snijega, snadbijevaju nas vodom i pružaju zaštitu od buke kako bismo mogli danju bolje raditi, a noću mirnije spavati. Predstavljaju idealno utočište za odmor i rekreaciju, a mogu biti i fantastične turističke destinacije.


Nažalost, šuma nije neograničen izvor i nemarno ponašanje čovjeka može dovesti do degradacije ekosistema tj. narušavanja njenog funkcionisanja. Zbog toga nastojimo približiti temu održivog gospodarenja šumom - racionalnog korištenja šume na način na koji se ne narušava balans među ekološkim, ekonomskim i sociološko-kulturološkim funkcijama šume kako bismo šume ostavili u što boljem stanju mlađim generacijama, tj. vama djeco.



DRVO IZ PRIVATNIH ŠUMA

Ovo igralište napravljeno je od drveta koje dolazi iz privatnih šuma. Možda su baš članovi vaše obitelji vlasnici šume koju ćete vi sutra naslijediti. Nažalost, privatne šume su u posljednjih nekoliko godina zanemarene i njima se ne upravlja održivo.

Ovu problematiku ne smijemo zanemarivati i zbog toga mi nastojimo dati novu i dodatnu vrijednost svakom drvetu koje potiče iz privatnih šuma.



DRVO - KAO MATERIJAL

Draga djeco, drvo ima hiljade oblika i funkcija. Možda niste obraćali pažnju, ali drvo je svuda oko nas. Svaki dan koristite drvo dok čitate knjige, crtate u vaše sveske, koristite papirne maramice, a sada se i igrate na igralištu od drveta. Nakon napornog dana sjednete na stolicu napravljenu od drveta da odmorite, a kada je lijepo vrijeme pomažete roditeljima pri farbanju drvene ograde oko vaše kuće. Moguće je da često ručate priborom napravljenim od drveta iz drvenog posuđa.

Objašnjenje zašto je drvo u velikoj mjeri zastupljeno u svakodnevnoj upotrebi je zbog toga što je riječ o materijalu koji je prirodan i obnovljiv, blaga boja i miris drveta djeluju opuštajuće na čovjeka, a upotrebom drveta postiže se osjećaj topline i obogaćuje prostor u kojem boravimo.

Zašto je DRVO PRVO među materijalima:



- ✓ ČISTO
- ✓ REKILIRAJUĆE
- ✓ LIJEPO
- ✓ DUGOTRAJNO
- ✓ SNAŽNO
- ✓ SJAJNO ZA GRADNJU
- ✓ ZVUČNO IZOLIRAJUĆI
- ✓ TOPLOTNA IZOLACIJA
- ✓ BESKRAJNA UPOTREBA

Dodatak za kraj - zanimljivost

Naučno je dokazano da drvene prostorije i enterijeri snižavaju nivo stresa kod čovjeka, poboljšavaju i ubrzavaju naš odmor i oporavak, podstiču bolju koncentraciju i moć razmišljanja kod djece, pa čak i usporavaju mentalni i fizički pad kod starijih. Drvo kao materijal stvara osjećaj udobnosti i povezanosti čovjeka kao živog bića s prirodom. Kod djece dodatno podstiče kreativnost i pažnju.

Stoga, provodite više vremena okruženi drvetom!

O projektu

Ovo igralište je izrađeno u okviru međunarodnog Programa „Osnajivanje zajednica putem demokratskog upravljanja prirodnim resursima“, koji zajedničkim snagama implementira regionalna nevladina organizacija Inicijativa za šumarstvo i okoliš - fea iz Sarajeva i Danska savjetodavna organizacija - DFE, uz druge partnere iz Nepala i Vijetnama.

Program je finansiran od strane Danske Vlade kroz Fond za jačanje civilnog društva - CISU, a implementira se uz podršku Ministarstva poljoprivrede, vodoprivrede i šumarstva i Kantonalne uprave za šumarstvo Srednjobosanskog kantona/Kantona Središnje Bosne i općine Travnik.

